

宋
史
新
編

宋史新編卷九十四

列傳三十六

明南京戶部主事莆田柯維騏著

查道

從兄

邊肅

梅詢

馬元方

薛田

寇瑊

楊日嚴

李行簡

章頻

陳琰

李宥

張秉

張擇行

鄭向

郭稹

查道字湛然休寧人端拱初舉進士高第歷通判遂州使者得公正清潔之狀以聞優詔嘉獎遷秩徙知果州寇黨何彥忠擁衆不聽撫詔道單馬趨賊所諭以詔意或識之曰仁郡守也寧害我乎卽相率投兵羅拜給券

歸農壘書褒諭咸平四年八月歸賜糾魚出知寧州會舉
賢良方正之士拜左正言直史館歷刑部郎中判吏部
選事糾祭在京刑獄進右司郎中大禧初以贖求外任
得知虢州卒道至孝母病思鰾羹方冬泣禱于河鑿冰
取之得鰾尺許以饋又剗臂血寫佛經母尋愈立心淳
厚有犯不校爲政過於寬頗不治嘗出按部從者摘路
側佳棗以獻道掛錢於樹而去京師官舍多聚親族之
尊獨者祿賜散隨盡不以屑意處交友亦然初赴舉缺
資用所親裒錢以贈路經滑臺過父友呂翁家翁卒將
鬻女襄事道傾錢與之又故人卒道爲贖其質女嫁士

族道好學嗜奕信內典平居多茹蔬或止一食默坐
日服玩卑儉嘗夢神人謂曰位至正郎壽五十七而享
年六十四蓋積善所延云有集二十卷從兄陶

陶字大均初事李煜登明法科補常州錄事參軍歸朝
詔大理評事試律學除本寺丞遷大理正歷遷祕書少
監判寺事時楊億知審刑陶數攻其失又命代之賜金
紫陶持法深刻屢坐失入罰金百餘斤無誤出者子拱
之淳化進士

邊肅字安國楚丘人進士及第累遷工部郎中知曹州
徙邢州會契丹大入城堞摧圯無守備真宗在澶州密

詔肅聽便宜肅匿詔不發督丁壯乘城而闕諸門悉所
部兵陣以代之騎薄城下肅與戰小勝敵莫測也居三
日引去時鎮魏深趙磁洛六州閉壁不出老幼趨城者
肅悉開門納之擢樞密直學士徙宣州歷徙真定府累
遷給事中代者王嗣宗以舊隙上其不法事奪三官貶
岳州團練副使後歷秦寧軍節度副使知秦州卒

梅詢字昌言宣城人少好學有辭辯進士及第歷三司
戶部判官詢自以爲遇主知屢上書陳論西北事凡數
十其言甚壯真宗欲命知制誥李沆力言其險薄望輕
不可用後斷訟失實降通判杭州知蘇州徙兩浙轉運

副使判三司開折司坐議天書出知濠州爲湖北轉運使坐擅假驛馬降通判襄州知鄂州徙蘇州爲陝西轉運使坐薦舉朱能貶懷州團練副使又以善寇準徙池州起歷翰林侍讀學士羣牧使累遷給事中知審官院病足出知許州卒故事侍讀學士無出外者天禧中張知白罷參知政事領此職始出知大名府非歷二府而出者自詢始詢性卞急好進而侈於奉養在濠州夢人告曰呂丞相至矣旣而呂夷簡通判州事故待之甚厚其後援廢斥中以至貴顯夷簡力也

馬元方字景山濮州人父應圖嘗知頓丘縣太宗攻幽

州應圖部芻糧沒虜中元方去髮爲浮屠間行求父尸
不得訴於朝上哀之爲官其兄元吉元方淳化三年進
士及第歷官右諫議大夫權三司使公事真宗謂宰臣
曰元方在三司何多謗也王旦曰元方盡心營職然性
下急且不納僚屬議而醜詆之所以賈怨帝曰僚屬顧
不有賢俊邪歲餘以煩苛罷進給事中權知開封府以
樞密直學士知并州留再任賜白金五百兩詔中書諭
委屬之意官至兵部侍郎卒

薛田字希稷河東人少師事种放與魏野友善進士起
家丹州推官歷侍御史益州路轉運使民間以鐵錢重

私爲券以便交易謂之交子而富家專之數致爭訟
請置交子務以權其出入未報及寇瑊守益州卒奏用
其議蜀人便之累遷右諫議大夫知延州久之以疾徙
同州又徙求興軍辭不行卒田性頗和厚初以幹敏數
爲大臣所稱後屢更任使所治無赫赫名

寇瑊字次公臨汝人第進士授蓬州軍事推官李順餘
黨謝才盛等復起瑊設方略擒送京師徙開封推官累
遷殿中侍御史爲開封判官真宗因其嘗領施州有靖
蠻功諭之曰東川控蠻夷爾功已試其爲朕鎮撫之命
爲梓州路轉運使多剛縣酋斗望劫瀘州燒涪井監殺

官吏帝遣內殿崇班王懷信議攻討招輯之宜城奏若不討除則諸夷競起爲邊害矣詔發陝西兵破之夷人相率來附而斗望猶拒珉與懷信又大破之衆遂降就加侍御史召爲三司鹽鐵判官逾月出爲河北轉運使天禧中河決澶洲城視役河上隄墊數里衆皆奔潰而城獨留須臾水爲折去衆異之遷工部郎中入爲三司度支副使未幾以右諫議大夫集賢院學士知益州仁宗卽位遷給事中珉與丁謂厚善帝謂輔臣曰珉有吏幹毋深譴也徙鄧州坐失舉降少府監知金州復右諫議大夫會河決徙知滑州總領修河河平擢樞密直

學士明年復給事中知秦州又坐失舉奪一官召權三
司使復其官如故權知開封府卒城少孤鞠於祖母王
氏及登朝以妻封邑回授之朝臣得回封祖母自城始
性頗踈財通音律知術數初附丁謂故少達及謂敗左
遷鬱鬱不自得祕書丞彭齊賦喪家徇以刺之

楊日嚴字垂訓河南人進士及第歷三司戶部度支鹽
鐵副使累遷右諫議大夫集賢院學士知河中府加樞
密直學士知益州奏罷擾民之賦遷勾當三班院知通
進銀臺司聞後守者其政不便蜀人因進對猶從容言
遠方所宜撫安無容變法以生事遷給事以龍圖閣

學士知澶州召權知開封府徙判太常司農寺同知審
官院卒日嚴初爲益州轉運使無他治能及爲守頗爲
蜀人信愛兄日華官至太常少卿三司副使

李行簡字易從馮翊人家貧刻志於學又聚木葉學書
筆法適勁登進士第歷遷太常博士知坊州王嗣宗薦
爲監察御史王旦數稱其才真宗雅亦知之再遷侍御
史還擢龍圖閣待制歷尚書刑部郎中帝數幸龍圖閣
命講周易間訪大臣能否行簡所對無怨昵各道其所
長人以爲長者久之拜右諫議大夫集賢院學士乾興
初改給事中以足疾請外得知河中府徙虢州卒

章頻字簡之浦城人與弟頌皆以進士試禮部預選

詔兄弟毋並舉頻卽推其弟棄去後六年乃擢第歷監察御史詔鞫邛州牙校訟鹽井事皇城使劉美依倚后家受賕使人市其獄頻請捕繫忤旨出知宣州改殿中侍御史遷侍御史頻雅善丁謂謂貶左遷監饒州酒起歷廣西轉運使擿宜州守貪暴不法旣罷去反訟頻千許嘗被刑冒奏爲郎頻坐謫知饒州復爲度支判官累遷刑部郎中使契丹至紫濛館卒

陳琰字伯玉臨河人進士及第歷遷殿中侍御史天聖五年祀南郊中外以爲丁謂復還琰疏謂奸邪請勿原

赦曰李德裕止因朋黨不復生還盧多遜曲事王藩卒
無牽復帝然之歷三司戶部度支鹽鐵副使積遷至尚
書工部郎中卒

李宥字仲嚴唐之後裔自吳徙青遂爲青人祖成五代
末以詩酒遊公卿間善摹寫山水至得意處疑非筆墨
所成世傳爲寶父覺見儒林傳宥幼不好弄長讀書屬
文不雜交遊舉進士歷知蘄州歲凶人散委嬰孩者相
屬于道宥令吏收取計口給穀俾營婦均養之累遷諫
議大夫知江寧府民有告人殺其子者曰吾子去家時
巾若巾今巾是矣民自証宥疑召問卒伸其枉府舍

火宥畏兵亂不救降職致仕起分司南京改太子賓客
判留司御史臺卒宥性清介然與物無忤好獎拔士人
外族甚貧宥有別業以券畀之既死家無餘財

張秉字孟節新安人父諤字昌言南唐祕書丞通判鄂
州守師南伐與州將卽歸款太祖授右贊善大夫蜀平
選知閬州累遷荆湖江浙等道制置茶鹽副使卒秉舉
進士甲科累遷工部郎中知制誥真宗立進秩兵部判
昭文館時草敘用官制有頃因微累謫於遐荒之語上
覽之曰若此則是先朝失刑矣遂除秉左諫議大夫連
知潁襄二州徙鳳翔府訴以母老貧窶詔給裝錢未行

改江陵丁母憂起復知河南府踐歷中外至工部侍郎
祥符祀汾陰爲東京留守判官轉禮部侍郎加樞密直
學士復知并州徙相州後復糾察在京刑獄暴疾卒表
典藩府無顯赫譽及再至太原臨事少斷多與賓佐博
奕雅好諧戲無儀檢人不以宿素稱之居常飭衣服潔
饌具每公宴及友家集會率自挈而往家甚貧常質衣
給費焉

張擇行字行先青州人進士起家爲右司諫與唐介包
拯共論張堯佐除恩太濫又論河北兵多財乏願分兵
就食內地不報歷天章閣待制知諫院累遷吏部員外

郎以疾提舉兗州仙源縣景靈宮踰年卒

鄭向字公明陳留人舉進士甲科累遷兩浙轉運副使
疏潤州蒜山漕河抵于江人便之歷龍圖閣直學士知
杭州卒五代亂亡史冊多漏失向著開皇紀三十卷撫
拾遺事頗有補焉

郭稹字仲微祥符人舉進士甲科累遷尚書刑部員外
郎同修起居注康定初使契丹其主加禮之與同出觀
獵延稹射稹一發中走兔衆皆愕視遺所乘馬及他物
甚厚歷龍圖閣直學士權知開封府卒稹性和易文思
敏瞻尤刻意於賦幼孤母邊更嫁既母亡稹請服喪詔

許之語在禮志

論曰查道行誼孚盜賊邊肅以羸兵却強虜完孤城皆奇績也馬元方李宥張秉莅官美矣不能無小疵張擇行鄭向郭稹雖鮮可議顧微赫赫名梅詢厚呂夷簡躡清華倖也寇瑊章頻黨丁謂遭貶斥宜也陳琰預沮丁謂之牽復史擬之唐袁高論執盧杞非耶

趙賀

高覲

袁抗

徐起

張旨

齊廓

鄭驤

趙賀字餘慶封丘人舉毛詩及第補臨朐縣主簿歷典州軍兩判宗正寺遷至給事中賀少喪明久之遇異醫

輒愈事繼母至孝在臨臚時用轉運使李中庸薦改官中庸沒無子賀爲主葬圖像祀于家優於吏事吏不敢欺蜀人號爲趙家關謂如關梁不可越也

高覲字會之宿州蘄人進士起家爲嘉興縣主簿歷京西轉運使徙益州彭州廣碕麗水二峽地出金宦者挾富人請置場募人夫採取之覲曰聚衆山谷間與夷獠雜處非遠方所宜且得不償失奏罷之王蒙正恃章獻太后親多占田嘉州詔勿收賦覲又極論其不可歷集賢院學士判尚書刑部進給事中知單州卒

袁抗字立之南昌人舉進士得同學究出身調尋朔縣

主簿累遷尚書金部員外郎歷益州路轉運使黎州歲
售蠻馬詔擇不任戰者却之抗奏朝廷與蠻夷互市非
所以取利也諸部落仰此爲衣食一旦失利侵侮不知
費直幾馬也尋如舊制除江准發運使召爲三司鹽鐵
副使時抗老矣爲御史劾罷累遷光祿少卿分司南京
明堂覃恩改少府監卒抗喜藏書至萬卷江西士大夫
家鮮及也子陟好學善爲詩終殿中丞

徐起字豫之鄆城人第進士初仕州縣歷荆湖北路江
西轉運使募富室得米十七萬斛賑餓殍復移粟以贍
河北京西者凡三百萬又歷知洪州徙兗州有都巡

虐所部衆持兵至庭下州人大恐起以禍福開諭之衆
感泣聽命因按致其首奏罷都巡檢復入爲度支判官
累遷祕書監知湖州卒

張旨字仲微河內人父延嘉頗讀書不預仕州上其行
賜號嵩山處士后進保定軍司法叅軍上書轉運使鍾
離瑾願補一縣尉捕劇賊以自効瑾壯其請爲奏徙安
平尉前後捕盜三百餘人歷知安豐縣大募富民輸粟
以給餓者旣而浚渾河三十里疏泄支流注芍陂爲斗
門溉田數萬頃外築堤以備水患累遷尚書屯田員外
郎通判府州州依山無外城旨預築以防寇城垂就寇

大至乃聯巨木補其罅督居民乘城力戰賊死傷者衆
隨解去以功遷都官員外郎徙知萊州葉清臣舉材堪
將帥召對改知邢州擢提點河東路刑獄范仲淹歐陽
脩復言其鷲武有謀略進工部郎中知鳳翔府累遷光
祿卿知潞晉二州以老疾權判西京御史臺卒

齊廓字公闢會稽人登進士第自梧州推官歷三司度
支開封府判官出爲江淮西南轉運使積官光祿卿直
祕閣以疾分司南京改祕書監卒廓寬柔恭謹人犯之
校弟唐爲吉州司理參軍嘗舉賢良方正對策人等
越州蔣堂奏廓唐父母垂老窮居鄉里二子委而之官

唐復久不歸省於是罷唐令侍養士論薄焉

鄭驥字士龍河南人登進士第更慶汝鄭秦州推官歷陝西轉運按察使兼二門發運使兩爲河北轉運使王則反討平之除天章閣待制知鳳翔府先是皇甫泌夏安期皆爲轉運使泌先謫去安期後至不及賞驥固辭不受願推功與二人復爲河北都轉運使累遷尚書工部郎中以疾知華州卒

論曰賢哉趙賀克孝敦交而吏治又何精且明也高觀罷採金袁抗通蠻夷互市徐起賑饑弭亂張旨浚河築城其勞伐亦咸可紀鄭驥有平寇功推讓僚友斯古之

道也齊廓兄弟棄親徇榮視賀有餘媿矣

王臻

魚周詢

賈黯

李京

吳鼎臣附

昌景初

馬遵附

吳及

范師道

沈邈

王臻字及之汝陰人曾致堯知壽州有詩名臻以文數十篇往見致堯覽之歎曰頽汝固多奇士舉進士中第歷淮南轉運副使時發運司建議濬淮南漕渠廢諸堰臻言揚州召伯堰實謝安爲之人思其功以比召伯不可廢也濬渠亦無所益召爲三司度支判官而發運司卒濬渠以通漕臻坐前異議降知睦州道復官徙

閩人欲報讎者先食野葛趨仇家闔死臻辨格鬪狀被
誣者往往釋去俗爲少變仁宗卽位累遷諫議大夫權
御史中丞卒臻剛嚴善決事所至有風跡

魚周詢字裕之雍丘人早孤好學舉進士中第歷三司
鹽鐵副使時渭州城水洛尹洙鄭戩爭未決詔周詢與
程戡相利害周詢是戩議遂城之累擢右諫議大夫權
御史中丞仁宗訪近臣天下之務諸所對多踈闊頗嘉
周詢詳敏知恩州張得一誅坐失舉出知永興軍數日
政成德軍未行卒帝嗟悼之贈工部侍郎周詢性和易
聞見該洽明吏事在安州時園吏見大蛇垂闌楯卽視

之乃周詢醉而假寐世傳其異

賈黯字直孺鄧州穰人擢進士第一歷遷左正言判三司開折司黯自以年少遭遇果於言事首論韓琦富弼范仲淹可大用杜樞覆張彥方獄將駁正忤執政意被絀黯言樞無罪且旨從中出恐自此貴幸近習陰肆讒毀害及善良不可不察時言者或論事亡狀輒戒勵窮詰黯奏非所以開廣言路請如唐太宗用王珪魏徵故事皆弗許皇祐四年同修起居注判鹽鐵勾院遷左司諫狄青除樞密副使會靈觀災黯竝有論奏擢知制誥錢延年除天章閣待制黯當命辭卽詆延年不才不宜

汚侍從封詞目還中書命遂寢歷知襄州迎父之官
父有故人在部中遣卒致問黯輒答卒父恚一夕歸鄉
里他日疾且亟黯不自安請徙郡及解官就養不報乃
棄官去而御史劾黯輒委州印撓朝廷法絀知郢州未
及行父死服除勾當三班院爲翰林學士累遷尚書左
司郎中權知開封府言者論黯剛愎自任罷爲同提舉
在京諸司庫務英宗卽位遷中書舍人受詔撰仁宗實
錄權知審刑院爲羣牧使時封拜皇子並除檢校大傅
黯言太師太傅太保是爲三師子爲父師於義不可請
自今改授三公下兩制議請如黯奏而中書亦謂自唐

以來親王無兼師傅者國朝以三師三公皆虛名故因而授之宜正其失詔可遷給事中權御史中丞未幾以呂誨知雜事誨以嘗彈治黯遂巡引避黯言嘗薦誨爲御史知其方正謹厚一時公言非有嫌怨願終與共事誨乃就職時帝初卽位王廣淵周孟陽以藩邸之舊數召對黯言俊又滿朝獨親近一二舊人示天下以不廣請如太宗故事召侍從館閣之臣以備顧問帝嘗從容謂黯曰朕欲用人少可任者黯對天下未嘗乏人顧所用如何爾退而上五事一知人之明二養育以漸三材不求備四以類薦舉五擇取自代後與兩制合議僕正

典禮數詣中書爭論會大雨水時黯已被疾上疏引三
行傳謂簡宗室逆天時則水不潤下且謂二三執政阿
諛容說違背經義言甚切至既病求出以翰林侍讀學
士知陳州未行卒年四十四口占遺奏數百言猶以濮
議爲請贈禮部侍郎初黯母陳歸宗繼母史在堂後迎
陳歸二母不相善黯能安以事之黯修潔自喜在朝數
言事人稱其介直然性下急初通判襄州疑優人戲已
以人齒噉之在開封爲罪人所詈又噉以人齒言者亦
以是詆焉

李京字伯升趙州人進士中第歷遷監察御史太史言

日當食不食羣臣皆賀京上疏謂寶元初定襄地震迨
今十年震動不已豈非西北二邊有窺中國之意乎二
月雷發聲在易爲豫言萬物出地皆悅豫也八月收聲
在易爲歸妹言雷聲入地避羣陰之害也今孟夏雷未
發聲豈非號令不信乎仁宗嘉納授右正言直集賢院
同管勾國子監加史館修撰數上書論事宰相賈昌朝
不悅京嘗屬侍御史吳鼎臣薦推直官李定鼎臣希昌
朝意以告中丞高若訥若訥爲鼎臣上京簡謫京太常
博士監鄂州稅旣至引令狐峘錢徽事言臣爲御史諫
官首尾五年凡六上章四親對自陳疾懇求外補

出處粗有本末向簡鼎臣留寔補御史鼎臣亦謂議協
公望不意逾兩月乃誣臣朋黨臣與寔僚友鼎臣鄉曲
之舊鼎臣爲御史臣延譽推引待之不疑因以誠告豈
謂傾險包藏甘爲鷹犬惟陛下察之未幾卒

鼎臣棣州人既逐京會昌朝罷召相夏竦鼎臣復論罷
之遂以刑部員外郎知諫院上言朝廷與契丹保誓約
而楊懷敏輒增塘水不免生事遂爲河北體量安撫令
經度塘水利害鼎臣依違不能決拜天章閣待制卒

呂景初字冲之開封人以父蔭試祕書省校書郎第進
士歷殿中侍御史時兵冗用度乏景初奏疏曰聖人在

上不能無災而有救災之術今百姓困窮國用虛竭議者屢以爲言陛下不卽更者由大臣媮安避怨論事之臣又復緘默則此弊何時而息坐奏彈梁適不實謫官復召還嘉祐初大雨水景初曰此陰盛陽微之誠也乃上疏稱商周之盛竝建同姓兩漢皇子多封大國有唐宗室出爲刺史國朝二宗相繼尹京願擇宗子之賢者使得間安侍膳於宮中以消奸萌或尹京典郡爲夾輔之勢時狄青爲樞密使得士卒心議者憂其爲變景初奏疏曰天象謫見妖人訛言蓋以未立皇子社稷有此大憂惟陛下蚤爲之計又數詣中書白執政請出青文

彥博謂青忠謹有素外言不足置意景初曰青雖忠如
衆心何蓋爲小人無識則或以致變大臣立爲朝廷慮
毋牽閭里恩也知制誥劉敞亦論之甚力卒出青知陳
州擢至天章閣待制知諫院病未入謝卒

馬遵者字仲塗樂平人歷官右司諫以禮部員外郎兼
侍御史知雜事改吏部直龍圖閣卒性樂易善議論其
言事不爲激訐故多見推行杜衍范仲淹皆稱道之

吳及字幾道靜海人年十七以進士起家爲候官尉辟
大理寺檢法官徙審刑院詳議累遷太常博士仁宗左
右內臣凡四千餘人及上疏曰肉刑有五一日官古人

除之重絕人之世今則宦官之家競求他子勤絕人理
希求爵命童幼何罪陷於刀鋸因而天死者未易悉數
夫有疾而夭治世所羞况無疾乎有罪而宮前王不忍
况無罪乎臣聞漢永平之際中常侍四員小黃門十人
唐太宗定制無得踰百員且以祖宗近事較之祖宗時
宦官凡幾何人今凡幾何人臣愚以謂胎卵傷而鳳凰
不至宦官多而繼嗣未育也帝異其言欲用爲諫官以
憂去嘉祐三年權祕閣校理踰月改右正言上疏曰陛
下根本未立上下之憂無大於此旣而復言開寶詔書
內侍臣年三十無養父者聽養一子爲嗣比年此禁益

弛天絕人理陰累聖嗣願明舊制以綏福祐明年遂
罷內臣進養子管勾登聞檢院又上書論政事多施用
之明年日食三朝及言日食者陰侵陽之戒在人事則
臣陵君妻乘夫四夷侵中國今大臣無姑息之政失在
陛下淵默臨朝使陰邪未盡屏也后妃無權橫之家失
在左右親倖驕縱亡節也疆場無虞失在將帥非其人
爲敵所輕也因言孫沔在并州苛暴不法燕飲無度龐
籍前在并州輕動寡謀輒興堡砦屈野之衄爲國深恥
沔絲此坐廢久之遷右司諫管勾國子監在職數年以
勁正稱嘗請用唐李吉甫故事選拔賢俊約杜預遺法

旌擢守令會諫官陳升之建請裁節班行補授下兩制
臺諫官集議主鐵冶者舊得補班行至是議罷之既定
豪及與御史沈起輒增注興國軍磁湖鐵冶如舊制主
磁湖冶者大姓程叔良也翰林學士胡宿等卽劾及與
起職在臺諫而爲程氏經營占錮恩例及出爲工部員
外郎知廬州進戶部直昭文館知桂州卒及當官有守
初爲檢法官三司請重鑄鐵錢法至死下有司議及爭
不可主者恚曰立天下法當由一檢法邪及曰義理爲
先安有高下卒不爲詘

范師道字貫之長洲人進士及第爲撫州判官遷至御

史初賈昌朝上議置五輔郡設轉運使提點刑獄號爲
拱輔京師而論者謂宦官謀收事柄師道力奏非便遂
復舊制宰相劉沆護葬溫成禮官議稱陵師道數以爭
沆惡之引著令臺官滿二年當補外出知常州徙廣南
東路轉運使改兩浙遷起居舍人同知諫院管勾國子
監後宮周氏董氏生公主諸閤女御多遷擢師道上疏
曰婦人女子與小人之性同寵幸太過則瀆慢之心生
恩澤不節則無厭之怨起且用度太煩須索尤廣一才
人之奉月直中戶百家之賦歲時賜予不在焉况誥命
之出不自有司豈盛時事耶時大星隕東南有聲如雷

又疏言天狗之應有大賊宜詔天下預爲備禦遷兵部員外郎兼侍御史知雜事判都水監與諫官御史數奏樞密副使陳升之不當用升之罷師道亦出知福州頃之以工部郎中入爲三司鹽鐵副使以疾遷戶部直龍圖閣知明州卒師道厲風操前後在言責所言甚衆不避權倖仁宗晚年恭儉四方無事師道言雖過每優容焉

沈邈字子山弋陽人進士及第歷侍御史論夏竦陰交內侍劉從愿使從愿內濟狡譎竦外專機務姦黨得計人主之權去矣累遷天章閣待制知澶州徙河北都轉

運使又徙陝西歲中加刑部郎中知延州卒邈疎爽有
治才然性少檢云

論曰春和而雉鳴秋凜而鶚疾時使之然也慶曆以來
陽德方亨言路無壅諫官御史優於其職者殆數十人
剛斷則王臻該洽則魚周詢脩潔則賈黯勁正則吳及
風操則范師道論議則馬遵至若李京見忌於昌朝呂
景初不撓於彥博均一時翹楚沈邈如非酣酒少檢其
才略亦不可勝道哉

天史新編卷九十四

宋史新編卷九十五

列傳三十七

明南京戶部主事莆田柯維騏著

張盥之

魏瓘弟琰

滕宗諒州

李防

趙湘

唐肅子詢

李絢

何中立

張述

黃震

胡順之

陳貫子安石

范祥子育

田京

張盥之字景山父祕盥之進士及第歷提點淮南路刑獄楊崇勳知亳州恃恩爲不法誣蒙城知縣王申罪械送獄盥之廉得寃狀乃出申配姦吏若干人累擢天章閣待制河北都轉運按察使保州卒殺通判石待舉爲

亂盪之自魏馳至城下召諸將部分攻城平之除戶部副使坐田况潛殺降兵預知其謀奪職知澆州被訟再降謫後復待制知湖州徙揚州以光祿卿致仕卒盪之喜吏事所至有聲退居築家廟率子弟歲時奉祠

魏瓘字用之以父羽蔭入官門人魏綱疏詆天書流海島瓘爲開封倉曹參軍坐停後歷提點廣南西路刑獄邕州僚戶緣逋負沒婦女爲備者千人悉奏還之就除轉運使召爲度支判官累遷太常少卿知廣州拜右諫議大夫再任前臨江軍判官史沆以私憾奏瓘沆坐不實廢瓘亦降知鄂州歷給事中知開封府政事嚴明吏

氏憚之坐論降知越州儂智高寇廣東西獨廣州城堅
守不能下於是論築城功遷工部侍郎集賢院學士復
知廣州兼廣東經略安撫使下溪州蠻叛將發兵討除
進龍圖閣直學士知荆南瓘以爲五溪之險師行鳥道
諸將貪功生事於國家何利因條三策以招徠爲上不
報後卒如瓘議徙澶州滑州又徙鄧州不行請老以吏
部侍郎致仕卒瓘所至整辦與人置對未嘗屈史沆王
述以善訟名天下瓘旣廢沆又嘗奏抵達罪專任機數
不稱循吏弟琰

琰字子浩蔭授祕書省正字爲吏強敏名與瓘齊歷知

壽潤滁安州壽州盜殺寺童子有司執僧答服琰憫其
非罪命脫械縱去數日果得真盜累官司農卿知福州
徙廣州以疾知江寧府晚昏眊縱私人亂法日答朴無
罪吏卒監司劾奏召判刑部仍致仕進衛尉卿卒

滕宗諒字子京河南人第進士歷知當塗邵武二縣遷
殿中丞代還會禁中火詔劾所從起宗諒與祕書丞劉
越皆疏諫仁宗爲罷詔獄時章獻太后猶臨朝宗諒言
國家以火德王天下火失其性由政失其本因請太后
還政而越亦上疏太后崩擢嘗言還政者越已卒贈右
司諫而除宗諒左正言宗諒後遷左司諫坐言宮禁事

不實降知信州與范諷雅相善諷貶宗諒降監池州
久之通判江寧府徙知湖州元昊反除刑部員外郎直
集賢院知涇州仲淹薦自代擢天章閣待制徙慶州御
史梁堅劾奏宗諒前在涇州濫費公錢仲淹時參知政
事力救之止降一官知虢州御史中丞王拱辰論奏不
已復徙岳州稍遷蘇州卒宗諒尚氣倜儻自任好施與
及卒無餘財所莅州喜建學而湖州最盛學者傾江淮
間有諫疏二十餘篇劉越者字子長大名入宗諒同年
進士雅有學行嘗爲二縣令有能名

李防字智周大名入第進士爲莫州軍事推官歷尚書

工部員外郎爲三司戶部判官景德初江南旱詔與張知白分東西路安撫上言秦義嘗增江淮兩浙荆湖權酷錢民頗煩擾江南以歲饑權罷而淮南荆湖未被德音詔悉罷之仍詔義等毋得復增權酷之利遂爲江南轉運徙知應天府鑿府西障口爲斗門洩汴水淤旁田數百畝民甚利之又徙興元府入爲三司鹽鐵判官坐失舉免後累遷給事中復知延州更耀路二州卒

趙湘字巨源華州人進士甲科歷知隴州興元府遷太常博士上補政忠言十篇召判宗正寺久之上書言元德李太后母育聖躬請祔太宗廟室後用其說累遷侍

御史昇州火命湘往致祠兼問民疾苦還奏監司知
不稱職者罷黜之糾察刑獄改尚書刑部員外郎兼侍
御史知雜事時真宗親製五箴以自儆湘因言宗室風
化所本宜有以訓厲之帝悅爲製宗室座右銘賜諸王
并及湘祀汾陰爲考制度副使請如周官置土訓錄所
過州縣山川與俗好惡日上奏御兼判宗正寺歷知諸
州府進至右諫議大夫集賢院學士自河南府以疾徙
虢州卒

唐肅字叔元錢塘人第進士初歷泰州司理參軍有商
寓逆旅而同宿者殺人亡去商夜聞人聲往視之血沾

衣爲捕吏所執州趣獄具肅探知其冤持之後數日得
殺人者累官龍圖閣待制登聞檢院知審刑院卒子詢
詢字彥猷以父任爲將作監主簿天聖中詔許天下士
獻文章應詔者百數有司第其善者詢數人而已詔賜
進士及第知長興縣後以太常博士知歸州用翰林學
士吳育薦爲御史未至喪母服除育方參政事宰相賈
昌朝與詢有親嫌育數言詢用故事當罷御史中丞張
方平乃奏留詢育爭不能得詢由是怨育而附昌朝昌
朝雅不善育詢希旨上奏謂制科漢唐不常置不可與
進士同時設科育亦奏進士數年一舉因以制科隨之

則事與時宜又從而更張之使遺材絕望非所以廣
路也仁宗是育言詔自今制科隨進士貢舉著為令時
育由制科進帝以為得人故詢力排詆後詢終以故事
罷御史除尚書工部員外郎直史館知湖州歷知制誥
以參知政事曾公亮親嫌出知蘇州徙杭青二州進翰
林侍讀學士累遷右諫議大夫召還勾當三班院判太
常寺進給事中卒贈禮部侍郎詢晚改節知湖州納官
妓為妾素好畜硯著硯錄子垞附王安石傳

李絢字公素邳州人少放蕩亡檢兄絢教之書嚴其課
業而出絢傲自若比暮絢歸絢徐取書視之一過輒誦

數千言絢奇之稍長能屬文尤工歌詩嘗以事被繫既而逸去登進士第再授大理評事通判邠州元昊犯延州竝邊皆恐邠城陴不完絢方攝守卽發民治城僚吏皆謂當言上待報絢不聽帝聞之喜因詔他州悉治守備歷脩起居注糾察在京刑獄出知潤州改太常丞徙洪州時五溪蠻寇湖南擇轉運使帝曰有館職善飲酒者爲誰今安在輔臣未諭帝曰是往歲城邠州者其人才可用輔臣以絢對遂除湖南轉運使絢諭蠻以禍福卒罷兵聽命累遷龍圖閣直學士起居舍人權知開封府治有能名絢夜醉晨奏事酒未解乃改提舉在京諸

司庫務權判吏部流內銓坐初誤釋盜御物者絀知蘇州未行卒絢少周遊四方頗練世務數上書言便宜仁宗春秋高未有繼嗣絢因祀高禱還獻賦大指言宜遠嬖寵近賢良則神降之福子孫繁衍帝嘉納之

何中立字公南許州人幼警邁進士及第官中外歷殿中丞至樞密直學士最後知杭州卒中立頗以文詞自喜然嗜酒無行蘇舜欽賽神會預者皆一時知名士中立在召中已而辭不往後舜欽等得罪中立有力焉

論曰張盪之察寃懲姦討平叛卒之功尤茂魏瓘荐在劇任恩威並著招徠叛蠻廟堂竟用其策勝宗諒劉越

疏請章獻還政風槩凜然宗諒所至興學尤非俗吏所能爲魏琰唐肅明庶獄李防趙湘李絢陳世務咸敏達才也歷觀諸人素履間有小疵尺瑜寸瑕奚害爲寶若唐詢何中立之無行殆珉中而玉表歟

張述字紹明遂州人第進士調咸陽縣主簿改大理寺丞遷太常寺博士皇祐中仁宗未有皇子述上疏請建儲曰匹夫有百金之產猶能定謀託後事出于素况有天下者哉至和元年復上疏曰歷觀前世或令出宮闈或謀起閹寺或姦臣首議利幼主以專政假後宮以盜權安危之機發於頃刻朝議恬然曾不爲計此臣養奉

爲陛下言也述前後七上疏最後語尤激仁宗終不以爲罪歷通判延州知泗州皆有政跡後以尚書職方員外郎爲江浙諸路提點坑冶鐵錢事道病卒

黃震字伯起浦城人進士及第累遷江淮發運使先任李溥爲不法丁謂黨之無敢言者震將行上書自陳辭頗憤激真宗知意在溥諭之曰卿當與人和震對曰廉正公忠臣職也負陛下任使者臣不敢與之和旣至發溥數十事溥坐廢震亦爲溥訟奪一官罷畏謂權不敢自直謂貶乃復官歷廣東轉運使旣卒詔進官一等

胡順之字孝先原州人第進士歷青州從事大姓麻士

瑤陰結貴侍匿兵械服用擬尚方親黨僕使甚多州縣
數被陵蔑會士瑤殺兄子被訟衆相視莫敢捕順之持
檄徑去盡得其黨有詔鞫問士瑤論死子弟坐流放者
百餘人再遷祕書丞分司南京仁宗卽位遷太常博士
掌冊上宰相書乞太后還政太后崩帝嘉其忠特遷尚
書屯田員外郎數論朝廷事仲淹愛其才然挾術尚權
喜縱橫桀闔以失明廢州里皆憚焉

陳貫字仲通河陽人少倜儻數上䟽言邊事舉進士真
宗識貫名擢真高第自縣簿歷官二司戶部鹽鐵副使
遷至刑部郎中直昭文館知相州還朝卒貫喜言兵威

平中大將楊瓊王榮喪師而歸貫上書曰前日不斬傳
潛張昭允使瓊輩畏死不畏法真宗嘉納之又嘗上形
勢選將練兵論後著兵略世頗稱焉子安石

安石字子堅以蔭鎖廳及第嘉祐中爲夔陝轉運判官
提點陝西刑獄攝帥鄜延能用謀者敵動靜輒先聞嘗
敕邊民戒嚴旣而數萬騎奄至無所獲而去璽書嘉之
歷河東都轉運使進天章閣待制王中正帥東師而西
報安石持四十日糧而師駐白草平彌月安石慮乏軍
興卽擅發民再餉乃以聞於是被劾下獄旣而他路餽
糧多不繼神宗察其無非赦之尚書省初建召爲戶部

侍郎嘗與右曹李定同奏事帝目留之曰卿豈非在淮南日不肯保李定持服者乎因獎之曰以實事君朕所與也進吏部侍郎選人將改京官須次久臨當引對率困於刑寺審問或沮以微文則一跌不復安石則罷再問以絕曩弊遂爲後法出知永興軍鄧襄陳鄭州河陽至龍圖閣直學士卒年八十一

范祥字晉公邠州人進士及第歷知慶汝華三州提舉陝西銀銅坑冶鑄錢祥曉達財利建議變鹽法後人不敢易稍加損益輒不便語在食貨志提點本路刑獄制置解鹽累遷度支員外郎權轉運副使古渭州距秦州

三百里道經岬兒峽邊城數請城之朝廷以艱餽餉不
許祥權領州事驟請修築未報輒自興役蕃部驚擾官
軍戰死者千餘人坐削一官知唐州後復官提舉陝西
緣邊青白鹽改制置解鹽使卒嘉祐中包拯言祥通陝
西鹽法其勞可錄乃官其子孫熙寧中論者謂祥卽古
渭爲砦足以消沮邊隙詔贈祕書錄一子未官者子育
育字巽之第進士爲涇陽令以養親謁歸從張載學用
薦授崇文校書監察御史裏行神宗喻之曰書稱聖讒
說殄行此朕任御史之意也育請用大學誠意正心以
治天下因薦載等數人西夏入環慶詔育行邊還言邊

事上皆從之坐劾李定親喪匿服罷御史檢正中書戶
房固辭乃知韓城縣詔往鄜延議畫地界育言保疆不
如持約持約不如敦信今我見利而加兵當講好之後
復自立界不亦愧乎歷直龍圖閣鎮秦州元祐初召爲
太常少卿改光祿卿樞密都承旨劉安世暴其閨門不
肅出知熙州時又議棄質孤勝如兩堡育爭之又請城
李諾平汝遮川不報入爲給事中戶部侍郎卒紹興中
採其抗論棄地及進築之策贈寶文閣學士

田京字簡之亳州人第進士爲提點河北刑獄事王則
據恩州反京縋城趣南關南關民衆多得不陷京有功

焉京督士攻城甚力賊係京妻子乘城迫使呼曰毋
攻城中將屠我輩矣京叱諸軍益進攻注矢仰射殺其
家四人賊知京無所顧乃牽妻子去恩州平以不能預
察貶官御史言失察過輕忘家爲國義獨重乃以判充
州歷知滄州官至右諫議大夫卒京喜論議然語繁而
迂頗通兵戰曆筭雜家之術爲人尚氣節少時與常山
董士廉汾陰郭京相友善俱以倜儻聞著天人流術通
儒子十數書又有奏議十卷

論曰自唐宣宗以來上書者以建儲爲諱仁宗春秋高
誰敢言者張述奮不慮身激切累疏范鎮司馬光繼有

請蓋述信之黃震忤特宰胡順之諫東朝均爲直臣陳貫范祥父子並優邊計謂儒生能之耶妖盜竊發田京且守且攻靡顧妻孥個儻之士臨難始見奇節云

周渭

梁鼎

范正辭

子諷 劉師道

王濟

方偕

曹穎叔

劉元瑜

楊告

趙及

劉湜

王彬

沖簡

周渭字得臣恭城人幼孤養于諸父力學工爲詩劉鋹祿五嶺政繁賦重民不聊生渭率鄉人六百踰嶺將避地零陵未至賊起斷道絕糧復還恭城則廬舍煨燼遂

奔道州爲盜所襲渭脫身北上建隆初至京師爲薛居正所禮上書言時務召試賜同進士出身解褐白馬主簿歷通判興州兼本砦鈐轄渭在郡以簡肅稱及還吏民遮道泣留俄詔賜錢百萬太平興國二年爲廣南諸州轉運副使移書交趾諭朝廷威信將刻日再舉黎桓懼卽遣使入貢就加監察御史歷判戶部度支二勾院出知亳州換宋州加職方員外郎爲益州轉運使坐從子違詔市馬黜爲彰信軍節度副使真宗聞其清節召還將復用詔下而卒年七十七上閔其貧不克葬贖錢十萬渭妻莫荃賢婦人也渭北走時不暇與荃訣二子

孩幼荃尚少父母欲嫁之荃泣誓曰渭非父困者今違
難遠適必能自奮於是親蠶績碓春以給朝夕二子皆
畢婚娶凡二十六年復見渭朱昂爲著節婦傳

梁鼎字凝正益州人進士甲科端拱初獻聖德徽號頌
萬餘言遷殿中丞通判歙州徙知吉州皆有能名代還
帝賜犀帶記名御屏淳化中上言今之知州卽古之刺
史大失勸懲之理寢成苟且之風是致水旱荐臻獄訟
填溢乞申明考績之法庶幾官得其人矣累遷都官員
外郎江南轉運副使就改起居舍人徙陝西坐軍儲失
期削三任復爲殿中丞領職如故以母老求郡歷守徐

密二州真宗踐位復舊官後拜右諫議大夫度支使時
西鄙未寧建議陝西禁解池鹽所在官鬻詔從之以鼎
爲制置使上封章密陳其煩擾者甚衆詔罷度支使守
本官未幾丁內艱起復景德初知三班院通進銀臺司
兼門下封駁事出知鳳翔府以居憂哭泣傷目表求判
西京留司御史臺卒年五十二賜二子出身鼎偉姿貌
磊落尚氣有介節居官峻厲名稱甚茂好學工篆籀八
分嘗著隱書三卷史論二十篇學古詩五十篇

范正辭字直道齊州人治春秋公羊穀梁登第歷左贊
善大夫知淄州累遷膳部員外郎充江南轉運副使饒

州民甘紹者積財鉅萬爲羣盜所掠州捕繫十四人獄
具當死正辭按部察其非實命徙他所訊鞫旣而民有
告羣盜所在者正辭潛召監軍王愿掩捕之愿未至盜
遁去正辭卽單騎出郭二十里追及之賊控弦持刃來
逼正辭大呼以鞭擊之中賊雙目執之賊自刃不殊餘
賊渡江散走追之不獲旁得所棄賊賊尚有餘息載歸
傳藥創旣愈按其姦狀伏法而前十四人皆得釋遷至
考功員外郎通判定揚杭三州真宗卽位累遷河東轉
運使兼侍御史知雜事時李昌齡自忠武行軍起知梓
州董儼知壽州王德裔楊紘皆任轉運使後失官卒

邑正辭上言昌齡輩貪墨著聞乞罷其民政從之坐
任謫獄貶滁州團練副使會赦復爲倉部考功員外郎
通判鄆州知淮陽軍復膳部郎中以年老求監兗州商
稅卒年七十五子識諷竝進士及第

諷字補之以蔭補將作監主簿獻東封賦遷太常寺奉
禮郎又獻所爲文召試入等出知平陰縣存視貧弱至
豪猾大家峻法治之登進士第歷通判鄆州時知州李
迪貶衡州副使宰相丁謂戒使者促上道諷輒留迪數
日爲治裝祖行累遷太常博士以疾監舒州靈仙觀尚
御藥張懷德至觀齋祠諷頗要結之懷德薦于章獻太

后遂召還問所欲言對曰今權臣驕悍將不可制蓋指
曹利用也利用貶拜右司諫三司度支判官王清昭應
宮災下有司治火所起諷諫止議者疑復修諷又疏請
下詔明示四方罷不復修從之累擢天章閣待制知審
刑院出知青州再遷戶部郎中時山東饑宰相王曾青
人家積粟多諷發取數千斛濟饑民入爲右諫議大夫
權御史中丞錢惟演倡議獻懿二太后宜祔真宗廟室
諷彈奏之及言其在太后時權寵甚盛且與后族連姻
請絀去仁宗不聽諷袖告身以對曰陛下不聽臣言臣
今奉使山陵而惟演守河南臣早暮憂刺客願納此不

敢復爲御史中丞矣帝不得已可之諷乃趨出遂貶
淮隨州歷龍圖閣直學士權三司使時狄棐爲直學士
已久諷盛氣凌棐宰相李迪右之遂特詔班棐上論者
非之尋轉閣學士以疾免三司使改翰林侍讀學士管
勾祥源觀徙會靈觀復改閣學士給事中知兗州旣至
郟而龐籍奏彈諷爲姦利遂置獄南京劾之諷坐擅馳
驛還兗州富贖籍所奏有不實當免官宰相呂夷簡嫉
諷詭激特貶諷武昌軍節度行軍司馬籍止降官知臨
江軍由是宰相李迪等坐親善諷皆斥歲中徙保信軍
後復給事中卒諷嘗建議朝廷當差擇能臣留以代大

臣不稱職者大臣聞而惡之又數短參知政事王隨于
帝前又嘗與張士遜議事不合諷曰世謂大事未易可
議小事不足爲所爲終何事邪及爲龐籍訟人謂大臣
陰主之諷類曠達然裨闔圖進不可名檢所與游者輒
慕其所爲時號東州逸黨山東人顏大加
之而姜潛者又嘗貽書疏其過云

憲詩刺

劉師道字損之一字宗聖開封人父澤右補闕師道舉
進士歷祠部員外郎出爲京東轉運使真宗累擢樞密
直學士掌三班俄擢三司使從幸澶淵判隨駕三司充
都轉運使坐事謫降以郊祀恩復起歷知潭州遷六常

少卿師道敏於吏事所至有聲長沙當湖嶺都會剖
析滯案無留事歲滿復加樞密直學士換左司郎中留
一任卒年五十四師道性慷慨尚氣善談世務與人交
敦篤工爲詩多與楊億輩酬唱當時稱之

王濟字巨川饒陽人父恕後唐特童子及第開寶中知
秀州會盜起城陷爲盜所殺將并害濟濟伏柩號慟謂
賊曰吾父已死吾安用生爲但恨力不能殺汝以報父
讎爾賊義之捨去雍熙中上書自陳死事之孤得試學
士院補龍溪主簿判登聞鼓院拜監察御史疏陳十事
皆切於時咸平初濟建議請刪定制敕乃命張齊賢領

其事濟預焉刑統舊條持仗行劫不以贓有無悉抵死
齊賢議貸不得財者濟不可因與齊賢廷爭數四濟詞
氣甚厲目齊賢爲腐儒然卒從齊賢議人以濟爲刻改
鹽鐵判官車駕巡師大名調丁夫十五萬修黃汴河濟
以爲勞民詔濟馳往經度還奏省十六七齊賢時爲相
以河決爲憂因對并召濟見齊賢請令濟署狀保河不
決濟曰河決亦陰陽災沴宰相苟能和陰陽弭災沴爲
國家致太平河之不決臣亦可保齊賢曰若是則今非
太平邪濟曰北有契丹西有繼遷兩河關右歲被侵擾
以陛下神武英略苟用得其人可以馴致今則未也上

勅容獨留濟問邊事著備邊策十五條以獻屬選官
大理寺上曰王濟近數言事似有操持可試之遂令濟
權判寺事時王欽若知審刑與濟素不相得乃因劉瑩
獄與濟賢共議坐濟故入停官累遷工部員外郎兼侍
御史知雜事後判司農寺受詔與劉綜改定茶法頗易
舊制由是忤丁謂林特劉承規輩因與欽若迭詆訾之
拜本曹郎中出知杭州遷刑部郎中濬治錢塘湖民頗
利之大中祥符三年徙知洪州兼江南西路安撫使卒
年五十九遺奏以進賢退諛罷上木不急之費爲言濟
頗涉經史好讀左氏春秋性剛直無所畏避少時深州

刺史念金鎖一見器之且託後於濟金鎖沒濟撫其孤
援真祿仕素與內臣裴愈有隙及愈坐事觸上怒濟力
爲辦理遂獲輕典

論曰周渭厲廉操梁鼎善規畫范正辭懲貪辨冤劉師
道喜談時務王濟正直不撓要皆應世雋豪惜弗克大
行厥志自昔優於一而薄於命者何限獨渭等然耶

方偕字齊古莆田人年二十及進士第爲温州軍事推
官後遷汀州判官權知建安縣縣產茶每歲先社日調
民數千鼓譟山旁以達陽氣偕以爲害農奏罷之累遷
侍御史南京鴻慶宮災偕引漢罷原廟故事請勿復

擢至天章閣待制江淮制置發運使知杭州又遷刑
郎中偕以吏事進治杭州有能聲喜飲酒至酣宴無節
數月暴中風以太常少卿分司西京遷光祿卿卒

曹穎叔字秀之亳州譙人初名熙嘗夢之官府見穎叔
名遂更名穎叔進士及第歷官天章閣待制知福州累
遷右司郎中爲陝西都轉運使自慶曆鑄大鐵錢行陝
西民盜鑄不已三司上權鐵之議穎叔曰鐵錢輕而貨
重不可久行况官自權鐵乎請罷鑄諸郡鐵錢以三鐵
錢當銅錢之一從之兩川和買絹給陝西兵而蜀人苦
於煩斂穎叔爲歲出本路緡錢五十萬以易軍衣之餘

諫職且奉使契丹對其主倣六國語辱國命請加罪
是論者以元瑜爲奸邪官終左諫議大夫知青州卒元
瑜嘗竊販禁物親與小人爭權其貪鄙如此

楊告字道之漢州人父允恭有傳允恭旣死太宗錄功
賜告同學究出身調廬江尉改豐城簿邑有賊殺人投
屍于江人知主名而畏不敢言告聞親往擒賊其黨棄
夜欲刺告告又捕得致於法境內肅然歷大理寺丞通
判江寧州盜殺商人鑿舟沉其屍被誣者答服獄具告
疑其無狀後數日果得真盜累遷右諫議大夫知鄭州
徙江寧府壽州告曉法令頗知財利而不務苛刻時號

能吏然喜事權貴以要進一子力學有文數爲近臣薦
召試賜同進士出身未幾卒告悲傷之尋卒

趙及字希之幽州人第進士爲慈州軍事推官累官兵
部員外郎兼侍御史知雜事數論時政權判吏部流內
銓初銓吏匿員闕與選人爲市及奏闕等卽榜之吏部
榜闕自及始歷知河中府特拜天章閣待制右司郎中
祀明堂遷右諫議大夫還判大理寺流內銓出知徐州
以疾求解職乃以本官管勾南京留司御史臺未赴卒
及和厚謙退內行尤篤所治有聲民吏愛之

劉湜字子正彭城人第進士歷殿中侍御史詔詣渭州

劾尹洙私用公使錢頗傳致重法洙坐廢還爲尚書
部員外郎兼侍御史知雜事同判吏部流內銓除鹽鐵
副使議者謂洙探宰相意罪洙故優擢焉後以事再降
知海州累擢天章閣待制知江寧府奏運蘇州米五十
萬斛貸饑民除戶部郎中知廣州居二年母老求內徙
遂徙徐州洙喜曰昔布衣隨計今以侍從官三品復典
鄉郡過始望矣又以左司郎中知鄆州遷龍圖閣直學
士知慶州改密州卒洙少賤母更嫁營卒旣登第具袍
笏趨不舎迎母歸養然性嗜酒持法少恕云

王彬固始人年十八賓貢入太學後進士及第積官祕

書省著作佐郎通判筠州歷知撫州撫州民李甲饒英
恃財武斷鄉曲彬按治之州里肅然累擢京西轉運使
徙河北部吏馬崇正倚章獻太后姻家豪橫不法彬發
其姦黜下吏忤太后意徙京東又徙河東陝西復爲三
司鹽鐵判官判都理欠憑由司遷至太常少卿卒

仲簡字畏之江都人以貧傭書楊億門下億教以詩賦
遂第進士歷遷兵部郎中擢天章閣待制知廣州儂智
高犯邕州沿江而下人告急簡輒囚之以是人不復爲
避賊計比智高至始令民入城民爭道競以金帛遺闈
者相蹂踐至死者甚多賊旣去以其能守城徙知荆南

既而言者論之遂落職又降刑部郎中知筠州復爲兵部郎中徙洪州卒仲簡任喜怒頗嚴厲無善政云

論曰蘇洵嘗病仁宗吏治偷惰敗官之罰不加嚴今觀仲簡信然若方偕曹穎叔楊告趙及王彬皆負康濟具欲自表見寧係於上之勸懲哉劉元瑜劉湜之規畫不在數子下顧詆誣善類世遂目爲姦邪惜夫

宋史新編卷九十五